



70 Joor Alti Garde, au miir fyre !

Wenn mir d Setz mit "Waisch no ?" starte
isch glaar: Es dien mir alte Gselle
in uns'rer eedle Alte Garde
vo friehner numme no verzelle.
Mir wüsse gnau, die beschte Dääg
sinn ummen und verbyy;
Mir syye - maine mir - no zwääg
...doch das isch Nostalgyy...
Mir dien bi uns im Glyggekäller
vor farbig-alte Helge,
vor alte Larve, Fasnachtsdäller
in däm, wo gsii isch schwelge.
Erfolgrych hämmer gruesst und piffe
und sinn dur d Stroosse gfägg,
hänn persifliert und Väärsli gschliffe
und so d Verainsgschicht prägt.
Mir hänn vyl Goldmedaille ghoolt
in dr Pfyff- und Drummelsparte,
dr Konkurränz dr A... versohlt,
wo die Junge no druff warte.
Graist simmer bis in d USA,
Deep River und au Washington,
hänn döört erfolgrych Ufftritt ghaa,
im Innehoof vom Pentagon.

Hüt gpüürt me d Zaiche vo dr Zyt,
mir pflääge s Faltegsicht;
E Dail vo uns isch nüm so fit,
E baar hänn Übergwicht.

Zwääg simmer no zem Jubilieri
an cirka dausig Feschtli;
Mir dien uns sälber inszeniere
mit Gescht und mit vyl Geschtli.

Mir wänn vor allem d Fasnacht gniesse.
Mir zelle zue de "Mildere".
Und wie die drei Dääg mir begiesse,
das wämmer doo kurz schildere:

Was gsehsch, wenn Stamm und Alti Garde
und d Binggis und die Junge
vom Alte Wartegg uus dien starte ?
...s isch kurioos und "glunge":

Dramaatisch wird s scho vor de Viere
wenn d VKB wott abmarschiere
und zwanzig Alti Garde-Sogge
no immer in dr Baiz dien hogge
für döört sich geegesytig z brichte
die kummervollschte Granggeschichte.
Und was döört jeede z klööne hett,
das glaubt kai Mensch, i mach e Wett:

Dr Eerscht sait: "Mi griegsch nit doo uuse,
ich möcht in dääre Knille pfluuse !"
E Pfyffer stöhnt, är miess kurz d Waade
im Kneipp'sche Wunderwasser baade.
E Drummmler schlieft mit Lydensmyne
diskreet in d Gummi-Stützstrümpf yye.
Ain sait, är wurd - doo gitt s nüt z lache -
drotz Härzschriftmacher Fasnacht mache.
Und ain vom Vordraab ghöört me grööle,
dass äär syy Hüftglängg no wott ööle.
En and're muess, drum duet är flueche,
im Rootwyy d Zahnprothese sueche.
E Wäägeler macht kurz und knapp
scho vor de Vieri zimlig schlapp.
E Drummmler macht sich an dr Hand
e präventyyve Tape-Verband,
Dr Waagechef kaa s nit verwinde
und muess ganz kurz diskreet verschwinde.
Aer muess - uff Hoochdütsch - no uff s "Näpfli"
und steggt sich denn Beruehigszäpfli,
doch denn verlosst är s Baize-Glännd
...abgstützt uff Stäggen in de Händ.

Doch ainewääg git jeede Maa
vyl digger als dr ander aa.
E määngge vo uns alte Knaabe
gseht bald nüm uff syy "Wärggzüü" aabe.
Är sait zwoor, är bring nit nur gaischtig
nai, au no sunscht e Super-Laischtig.
Doch wenn me d Frau diskreet duet frooge
Denn merggsch, dr Maa hett zimlig glooge
...will d Musggelgreft nit numme hinde,
nai, laider - schyynt s - au vorne: schwinde.

Bim Yystoh dussen uff dr Strooss
goht das Drama wiider loos
will ain duet schimpfe: "Nundefaane,
wo soll i mit mym Toupet aane ?
denn wenn das rutscht, denn isch s zem Gruuse
denn gsehn i nüm zer Larven uuse...
und uus däm Grund denn - soon e Saich -
my Drummle vor mir nümme braich".

Was uns aber sehr vyl nützt
isch d Jugend, wo uns unterstützt.
Die hilft uns engagiert und keck
und reschpeggiert uns alti Segg.
Si duet für unsere Altersreie
Verständnis und Vernunft uns zeige
und wäggslet mit vyl Sympathy
in uns're Höörgräat d Battery.
Denn kömme au no d Binggis z gumppe
und dien uns Alte d Rollstiehl pumpe.

Soo wärde mir lang wyter lääbe,
dangg uns're Junge und em Stamm.
Me gseht uns, so hänn mir s Besträäbe,
no ganz vyl Joor lang nit im "Lamm" !
...und wenn s in Fasnachts-Himmel goht,
wird unser Comité
e Glygge gseh vo altem Schroot.
und das isch: D VKB !

*D Ladäärne-Uusstellig uff em Minschterblatz und d Waage- und
Reggwisye-Uusstellig bi dr Kasärne sin vom Määntig znacht bis
am Mittwucho demorge. Deert und an de 3 Verkaufsständ in dr
Stadt ka me au alli Zeedel, d Schnit-zelbängg, d Blaggede und
dr Rädäbäng kaufe.
Kemmet au am Sunntig no dr Fasnacht (17-19 h) zer Zeedellää-
sede in s Glingedalmuseum. Dr Yydrift isch frei.*

*Buebe und Maitli mit Pfiff kenne ab em 7. Altersjoor in dr Pfyffer-
und Drummelschuel vo dr VKB gratis e halb Joor go
schnubbere.*